

ՈԳԵԿՈՉՈՒՄ՝ 98 ԱՄԵԱՅ ՄԵԾ ԵՂԵՌՆԻՆ

Ապրիլ ամսուան ընթացքին մենք կը համակուինք տխուր զգացումներով, երբ կը մտաբերենք թէ 98 տարիներ առաջ ենթարկուեցանք ցեղասպանութեան անարգ ոճիրին: Արդարեւ՝ Ապրիլին մենք տարբեր մթնոլորտի մէջ ապրող ժողովուրդի մը կը վերածուինք՝ իբր մնացորդածը Տէր Զօրի անապատներուն մէջ մահուան դատապարտուած հայկազնեան ցեղին՝ ապրելով յիշատակովը մեր 1,5 Միլիոն եւ աւելի նահատակներուն:

Ահա այս խորհուրդով, Մ.Ա.Հ.Ա.Ե.Միութեան Կեդրոնական Մարմինի Սուրիոյ բաժնի հովանաւորութեամբ տեղի ունեցաւ Հայ Աւետարանական Եկեղեցիներու Միացեալ Ոգեկոչման Պաշտամունք, նուիրուած հայոց ցեղասպանութեան 98-րդ ամեակին, Չորեքշաբթի 24 Ապրիլ, 2013-ի առաւօտեան, Հայ Աւետարանական Բեթէլ Եկեղեցիին մէջ:

Պաշտամունքի առաջնորդութիւնը կատարեց Պատուելի Սիմոն Տէր Սահակեան՝ երգեցողութեամբ, աղօթքով եւ 43-րդ սաղմոսի ու 54:1-3 համարներու ընթերցումով: Պաշտամունքի ընթացքին ներկաներ իրենց մասնակցութիւնը բերին երգեցողութեամբ ու յատկապէս երգելով՝ «Տէր Ողորմեա» շարականը խոստովանութեան հոգիով, աղօթքով ու աղաչանքով, խնդրելով Աստուծոյ ողորմութիւնն ու միջամտութիւնը հայոց դատի լուծման ի խնդիր:



Օրուան պատգամը մատուց Վեր. Սերոբ Մկրտիչեան, հիմնուած՝ Մարկոս 4:35-41: Ան իր խօսքին մէջ շեշտեց, թէ՛ Տէր Յիսուս պիտի խաղաղեցնէ մեր կեանքերը, երբ ամբողջապէս կը վստահինք Իրեն, ինչպէս փոթորիկը խաղաղեցուց երբ աշակերտները իրմէ խնդրեցին հրաշքի մը կատարումը, սաստելով հովը եւ ծովը: Ան նաեւ խաղաղութիւն պիտի պարգեւէ այսօր Ասպնջական Սուրիական հայրենիքին, մինչ կ'ապրի տագնապալից օրեր:

Պաշտամունքի ասարտին ներկաները հովիւներուն ուղղեկցութեամբ առաջնորդուեցան Բեթէլ Եկեղեցոյ շրջափակին մէջ գետեղուած յուշակոթողին դիմաց, գետեղելով ծաղկեփունջեր մեր 1,5 Միլիոն նահատաներուն աճիւններուն վրայ: Այս առթիւ Վերապատուելի համայնքապետը փոխանցեց իր սրտին խօսքը: Ան անդրադարձաւ ոգեկոչման հիմնական նպատակին մասին, շեշտելով, թէ՛ 98 տարիներ անցան, սակայն հայ ժողովուրդի սիրտն ու հոգին ճմլած ու միանգամայն անոնց հայացքը ուղղուած է դէպի երկինք, որովհետեւ երկրի ու երկնքի մէջ կախուած փրկութեան խաչը միայն կեանք տուող, յարութեան յաւիտենական յոյսը ներշնչող եւ Աստուծոյ ողորմութիւնը քաղցրութեամբ համեմուած բոլոր հաւատացողներուն համար է:



Վերապատուելին իր խօսքին ընդմէջէն շեշտեց, թէ՛ հայոց ցեղասպանութեան դարադարձը կը մօտենայ, սակայն այսօր

քաղաքակիրթ ժողովուրդներ, իրենց գլխաւոր դեսպանատուներուն եւ հիւպատոսութիւններուն ընդմէջէն փաստեր ապացուցանող իրականութիւններով կը զբաղին, մոռնալով, թէ իրենք ամէնէն հարագատ ականատեսներն ու վկաները դարձան հայ ժողովուրդի 1,5 Միլիոն եւ աւելի նահատակներուն: Ան կոչ ուղղեց ներկաներուն, իբրեւ հայ ազգի զաւակներ, հաւաքելու ուժ ու խտացնելու մտածողութիւն, որովհետեւ 1,5 Միլիոնը անկատար թիւ է ու անկատար թիւին դիմաց հայ ժողովուրդի թիւը այսօր կը հաշուէ 7 Միլիոն: 7 Միլիոն թիւը պիտի մնայ նաեւ անկատար, այնքան ատեն, որ մենք հայերս աշխարհով մէկ իբրեւ աւանդական կուսակցութիւններ եւ երեք յարանուանութիւններ միաձուլ չենք ազգային հարցերուն ու հիմնախնդիրներուն մէջ:

Վերապատուելին շարունակեց ըսելով, թէ՛ հայ ազգը իրաւունք չունի անտարբեր ըլլալու, մանաւանդ երբ հայոց ցեղասպանութեան դարադարձը կը մօտենայ եւ հայ ազգի պատմութեան հետ կը տողագրուի մեր անտարբերութիւնը, բաժանումները, ատելութիւնը եւ անոր մէջ կը ներթափանցէ ոսոխը՝ թուրքը, իր ջարդարար արարքներով 98 տարիներէ ի վեր հաւատարիմ մնաց իր ջարդարար յատկութեան ու նկարագրի մէջ: Թուրքը այսօր կը շարունակէ իր ջարդարար վատահամբաւ գործունէութիւնը նաեւ Սուրիական հայրենիքի օրհնեալ հողին վրայ, Սուրիաբնակ ու յատկապէս՝ հայաբնակ ժողովուրդին նկատմամբ: Թուրքը արհինարբու է ու թուրքին հետ ոչ մէկ ատեն կարելի չէ բարեկամանալ, նոյնիսկ դիւանագիտական մաշտապով, ան միշտ ազգերու եւ ժողովուրդներու ընդհանուր նկարագրի մէջ խաթարում կը ստեղծէ:



Վերապատուելին իր խօսքի աւարտին հրաւիրեց ներկաները միասնական ըլլալու իբրեւ ազգ ու ըսաւ. «Միացէ՛ք Հայեր երեք յարանուանութիւններով ու կուսակցութիւններով: Միացէ՛ք, յատկապէս՝ երբ այսօր ասպնջական Սուրիական հայրենիքը վտանգուած է: Սուրիական հայրենիքի հանդէպ ունեցած մեր հաւատարմութիւնը կրկին անգամ վերահաստատելու ենք: Մենք հաւատքով ու հրաշքով հասանք այս երկիրը՝ ոտնաբռապիկ, անօթի, անտուն, անտիրական: Այս հրաշքը կատարեց մեր մէջ ամենակալն Աստուած, որովհետեւ Ան կը կամենար, որ հայ ժողովուրդը ապրի: Այսօր, երբ կեանքի պարզելը ստացանք Աստուծմէ, չենք կրնար ըլլալ անտարբեր, ամենարժէքաւոր նուէրը ստանալէ ետք: Մենք իբրեւ հայ ազգ պիտի ապրինք ու ստեղծագործենք, մեր զաւակներուն հայ ժողովուրդի ազգային պատմութիւնը դաստիարակելով»:

Վերապատուելին իր խօսքը եզրափակեց կոչ ուղղելով յատկապէս՝ երիտասարդներուն, բարձր պահելու հայ լեզուն ու հայ մշակոյթը, սակայն միշտ գօտեպնդուած քրիստոնէական հաւատքով, ըլլալով ռահվիրաները հայ դատին դարադարձը չհասած, կրթելու ու դաստիարակելու իրենց զաւակները ազգային, մաքրամաքուր դիմագիծ կերտելու, Հայ լեզուն ուսումնասիրելու եւ իւրացնելու ու հայկականութեամբ ստեղծագործելու համար: Այն ատեն ազգերը պիտի յարգեն մեզ ու մեր զաւակները հայ տան ու եկեղեցիին մէջ ծնած ըլլալուն համար պիտի ըլլան հպարտ:

Ապա Վերապատուելի համայնքապետ մատուց աղօթք, որ Աստուած պահէ ու պաշտպանէ ազգը հայոց իր հովանիին ներքոյ:

Երանի՛ թէ այս օրերուն, Եղեռնի 98 ամեակի առիթով, մեր հոգիներուն ու սրտերուն մէջ դրոշմուին Հայր Ալիշանի այս գեղեցիկ բառերը. «Պանծա՞յք դուք ընդ հայրենասիրութեան ձեր, նորոգեցէք ապա զյիշատակս նախնեաց»: Մեր նախնիքներուն յիշատակը նորոգելով արտայայտենք մեր հայրենասիրութեան բարձր մակարդակը եւ որակը:

Զիրար սիրելով, զիրար մեծարելով, իրարու հանդուրժելով, եւ նեցուկ ու թիկունք կանգնելով, զիրար զօրացնելով՝ լաւագոյնս կը ծառայենք մեր արդար դատի հետապնդումին: Այսքան ողջմտութիւն եւ հասունութիւն ցոյց տալ ըլլայ մեր ուխտը՝ ի յարգանք մեր նահատակներուն անմեռ յիշատակին: